

Mahathir ke dua negara Eropah menarik pelabur

KUALA LUMPUR, Sabtu — Timbalan Perdana Menteri, Datuk Seri Dr. Mahathir Mohamed, hari ini berlepas ke Eropah untuk mengetuai rombongan galakan pelaburan di Malaysia.

Rombongan 25 orang pegawai Kerajaan dan wakil-wakil swasta akan melawat Switzerland dan Belgium hingga 13 Februari depan.

Pengerusi Lembaga Kemajuan Perindustrian Malaysia (MIDA), Datuk Jamil Jan menyertai rombongan tersebut selaku Timbalan Ketua rombongan.

Menurut kenyataan akhbar MIDA di sini hari ini, tujuan rombongan itu untuk mewujudkan hubungan terus dengan pengusaha-pengusaha industri dan kewangan di kedua negara Eropah itu.

Ia juga akan menarik minat mereka melabur di Malaysia.

Beberapa seminar dan dialog akan diadakan di Zurich (Switzerland) dan Brussels (Belgium) untuk memberitahu pengusaha-pengusaha dan ahli-ahli kewangan kedua negara itu mengenai dasar-dasar Kerajaan terhadap pelaburan asing.

Seorang dari 13 wakil sektor swasta ialah dari Dewan Perdagangan dan Perindustrian Melayu. Sebahagian dari tambang perjalanannya dibiayai oleh Kerajaan.

Menurut kenyataan itu, ini selaras dengan objektif Kerajaan untuk m e n e c e b u r k a n Bumiputera dalam industri dan memberi peluang menyertai rombongan penanaman modal asing dan mengetahui selok-beloknya.

Ia juga untuk menubuhkan projek-projek usahasama di Malaysia.

Dua wakil Perbadanan Kemajuan Ekonomi Negeri Sembilan dan beberapa ahli bank, peniaga dan eksekutif kanan termasuk pengusaha-pengusaha industri mewakili sektor swasta turut dalam rombongan itu.

Isteri Datuk Seri Dr. Mahathir, Datin Seri Dr. Siti Hasmah, juga turut sama.